

金文通公集

金文通公集卷之四目錄

吳江金之俊豈凡著

送別駕張立甫之任揚州序

送別駕陸英一之任平陽序

送泰州貳守孫茂先之任序

送倪玉如宰東流序

送盧雲柯令宿松序

送姚爾真令南漳序

送張幼仁令沔縣序

送高采夫宰歙縣序

贈吳江楊邑侯序

送同鄉諸學博還南序

送張道先司訓浦江序

送族子劍耿分訓東陽序

送朱炎馭司訓新昌序

送陳心簡南歸序

贈太學張生三省序

贈處士沈元子序

贈星士吳碩甫序

贈名醫張君慎初序

贈圓通寺寓僧竹憨序

金文通公集卷之四

吳江金之俊豈凡著

送別駕張立甫之任揚州序

攷故事掌倅貳郡政與長吏均禮凡兵民錢穀戶口
賦役獄訟聽斷之事可否裁決與守通簽所部官有
善否及職事修廢得刺舉以聞別駕之爲任蓋綦重
云余嘗守邢州四年邢地瘠賦輕民淳訟簡似爲守

者猶易以治而時有別駕某能通經術識世務其助
余良亦不淺他則竟爲贅員而反滋余以廢事之憂
余是以知別駕之任匪輕也憶曩日邢之士大夫孜
孜以經術課子弟者惟鉅鹿大銀臺重光張公爲最
今公次君立甫以待衛

特恩通判揚州公言于余曰吾子方事咕嗶一旦佐郡
且維揚劇地懼弗克任奈何余曰公之教子素矣余
久知公子弟中必有能以經術潤飾吏事者揚固劇
郡乎以通經學古能讀父書之立甫佐之其爲二千

石將伯之助非止一端也已嗚呼向使余不爲守則亦未知別駕之任之重向使余不獲交于張公則亦烏知立甫之能勝別駕之任如此其綽然也故于其行也信而喜之爲之序以贈焉

愈少愈貴愈直愈婉

陳百史先生評

送別駕陸英一之任平陽序

當湖陸子英一。聰明特達。吳越間號稱神童。垂髫食
餼。年甫二十。爲學使者所選拔。來貢于

廷。得高等。通判平陽府。陸子不以得官爲幸。而察其意。

似以未獲發其所蓄。中兩榜爲怏怏。知陸子者。亦相
與咨嗟惋惜。謂如此英妙儒者。不得大究其學。輒佐
郡。以去。余曰。是未知陸子真儒者。也是未知儒者之
效。無施而不宜也。按別駕之設。始自漢。隋唐因之。迭
有廢復。宋乾德初。始置諸州通判。懲五季藩鎮專擅。

之獎。而以儒臣臨制之。號稱監州。其官雖郡佐。而其
人間有出于朝廷之特命。不以官資之崇卑論。若是
乎重儒以重判也。所由來矣。非明六藝通文學。識聖
賢之理。究先王之術者。弗克與二千石共襄廉平之
治。陸子雖年少。端謹通亮。于書無所不讀。不負古賢
良文學之選。今往判平陽。我知必能佐其守。爲良二
千石。使庶民安其田里。而亡歎息愁恨之聲。有治理
效也。嗚呼。余嘗讀漢循吏傳。孝武之世。能以化治稱
者。惟江都相董仲舒。內史公孫弘。倪寬。居官可紀。三

人皆儒者。通于世務。明習文法。以經術潤飾吏事。天子器之。然則爲吏。患不儒者。患不兩榜哉。陸子何必以此怏怏。而知陸子者。亦不必咨嗟惋惜。虞其學之有弗究也。異日政成奏最。爲

聖天子所器。如漢三公。始信儒效。固彰彰不誣耳。英一名世楷。其父名濬。濬者。舉丙戌孝廉。與余兒世濂。有同譜誼。稔其家學。有自。故爲之序。以券之。

旣無剽掠之習。又能截去游移。公用語韓歐。未可許人。今乃見之盛事也。

陳百史先生評

送泰州貳守孫茂先之任序

大廷尉北海孫公有子文學君茂先。以待衛恩例。除同知泰州事。將行。廷尉公謂予曰。吾兒鉛槧書生。不習吏治。請有以教之。余曰。公之所以教貳守者足矣。何待余言。昔歐陽永叔之母告永叔曰。汝父爲吏。嘗夜燭治官書。屢廢而歎。吾問之。則曰。我求其生不得耳。吾曰。生可求乎。曰。求其生而不得。則死者與我皆無恨也。矧求而有得耶。嗚呼。其心厚于仁者耶。此吾知汝父必將有後也。汝其勉之。以後永叔文章政事。

果擅美一時。今公爲廷尉。每遇廷鞫大案。嘗多所平反。求其生而有得者。不知其凡幾。公雖不以告人。而公之心厚于仁者。寧減歐陽崇公哉。我知茂先以仁者之後。往貳是州。且讀書識道理。必能守其家法。凡所爲明刑簡訟。蠲煩除苛。以佐其守。爲賢刺史。而俾秦人之蒙其休澤者。將一如當年滁人之于歐陽永叔也。故曰。公之所以教貳守者。足矢何待予言。遂書以送之。

謹嚴於法讀如老成教後學前則永叔後則震川

視他文又有古今之別矣家學士言不虛也

陳百

史先生評

送倪玉如宰東流序

富陽倪子玉如以

廷試高等除池陽之東流令將行來別余而言曰生應
詔至禮部尚擬遲謁選再試棘闈以畢生平未了之
志今格于令遽有民社之膺未操刀而使割能無傷
指懼乎且聞東流地狹民甚瘠又偏處江濱時方弗
靖何道以治之乃可先生其有以教之余觀其貌泊
乎似有道者也聽其言又藹然其爲仁人也是固優
于宰者也因告之曰子旣知邑小而民貧則爲之勸

農桑以裕生計。寬徭役以休民力。抑強暴以安善良。速聽決以省繫獄。凡若此者。皆所以嘉惠疲瘠之地。而與以起色也。子旣知長江上游方苦弗靖。則爲之撫流移以固結土著。興學校以鼓舞士心。諭愚民以利害禍福。使之曉然不惑于訛言。率子弟以孝悌忠信。使之卓然不詭于異趨。凡若此者。皆所以消弭弗靖之萌而屹若金湯者也。子往矣。吾固知子之優于此矣。異日者。以循良奏績。膺異數。累爲大官。豎不朽業。使人嘖嘖嘆兩榜中。曾不多得。又何生平有未了。

之志哉。子往矣。倪生唯唯起謝教。余因是目送倪子。而竊有感焉。嗚呼。安得今天下之爲吏者。而盡有道人。人也。

有餘于法。有餘于情。似承伏照應。又似單行大雅。未墜必有英絕領袖之者。微先生其誰與歸。

陳百

史先生評

送盧雲柯令宿松序

盧生雲柯學道君子也歲戊子以恩選貢于

廷

擢高第除授江州宿松令或有爲盧生鰓鰓杞憂者

曰松彈丸邑濱江連楚轄有蘆洲頃被洲渚奸宄襲
破其城以呶唔未絕之書生一旦握符綰綬俾之外
捍震隣之寇內戢反側之奸以撫茲殘黎所爲者不
甚難乎余曰否否松邑失事非賊也民也非民之奸
爲亂也吏迫之也亦非吏之喜于迫民亂也奉法太
過而惟恐境內洲利不悉歸于上或稍漏于下以致

殫利而召害也。嗚呼！凡此皆爲吏者之不學道有以使之然也。學道則必愛人，愛人則必不盡其利，不盡其利又寧遽囂然喪樂生之心而敢于率其子弟攻其父母哉？盧生固學道君子也，吾知其必能愛人，必不肯盡民之利者也。爲保障不爲繭絲，爲冬日不爲夏日，何內奸之不戢，隣寇之足震也？然則盧生抱所學以治松，直易易耳，故于其行也特爲之伸其說而併以釋或人之憂。

前後結構渾渾幾無行墨，獨永叔有之，近則再見。

吾友也

陳百史先生評

金文通公集

卷之四

送盧雲柯
令南公序

十

送姚爾真令南漳序

今日吏治之多竄也。非盡吏之無材也。或人不宜其地而苦于風土氣候之不相習。或能不配其任而苦于兵燹殘壞之難爲理。于是其始而聞命也。先有趙超觀望徘徊不欲前之意。及其抵任也。又多愁居惕處歎息思歸不肯安焉久居之心。凡地方之利病得失。民情之順拂悲愉。悉置而不問。卽問矣而不詳。且盡求其身。視民家視國政行化成號稱古之循吏者。百不得一焉。無怪乎吏網雖嚴。民生日悴。卒無以宣。

布

聖天子軫念邦本嘉惠元元之至意而率土賓服之餘
尚有一二草澤遺奸所在乘間竊發者時或見告也
雖然若吏之真材者無不宜人之地亦無不配能之
任卽偏遠危險均有所不辭吳興姚子有焉姚子東
南名下士也以拔貢應順治五年

廷試居高等除襄陽南漳令今選人鮮不視楚爲畏途
甚至寧干規避之罰以求黜爲幸者獨姚子一聞除
命輒銳然欲取道中州從間抵任并不暇晷錦里歸

嗚呼以余觀于姚子其真吏之材者也夫始也旣無
趙趙觀望徘徊不欲前之意則其繼也必無愁居惕
處歎息思歸不肯安焉久居之心而有不詳盡以求
地方之利病得失民情之順拂悲愉者乎他日循吏
之稱舍姚子其誰漳之民其幸也夫安得凡爲吏者
而盡若姚子之不辭遠不辭危且險又何患吏治之
多贏也姚子字爾真名延儒其伯仲延啓延著皆成
丁亥進士而姚子其季云

讀之一氣條理密結無間今日乃復見歐曾耳

陳

百史先生評

送張幼仁令沔縣序

嘗聞吏不廉平則治道衰。欲興治道于今日。舍廉吏
亡繇哉。顧吏之鮮能爲廉者。非盡賦性貪墨也。良以
人生不無嗜好。而不有以坊之節之。則其資于已者
必不約。資于已者不約。則其取于世者必奢。一旦得
志居位。惟嗜好是徇。無恠乎廉吏之不槩見也。嗚呼
安得一泊然無所嗜好之人。立于民上而聿觀廉平
之治乎。乃若金陵張子其人。竊有異焉。張子字幼仁
名循。訥自有生來。口不沾腥味。體不被紈綺。浩浩落

落以古聖賢爲志。有疏水簞瓢之樂趣。富貴功名舉。不以介其懷。殆所謂泊然無所嗜好者也。今年偶值貢士例來試于

廷。

居高等。合有司格在他人。或志得而張子不加忻。及

除爲漢沔令。他人又或苦地惡。而張子不加戚。余是以知張子之爲廉吏也。必矣。蓋有不待政成而後見者矣。何也。張子旣泊然無嗜好。則必無所資於己。無所資于己。則亦必無所取于世。而天下之爲廉吏者。更有過于張子乎。吾不獨爲沔之人幸。而竊幸今日。

治道之興有其機也。或者曰。張子曾遇異人。善丹青。又曰。張子通三典。能一死生。解外膠。噫。吾不能知之矣。

是送張子文。每出一語。必有照應。結束文格。進于

老到

陳百史先生評

送高采夫宰歙縣序

唐陸倕以祠部員外郎出刺歙州昌黎爲文以送之。有云當今賦出于天下江南居十九宣使之所察歙爲富州宰臣之所薦聞天子之所選用其不輕而重也較然矣。于是知江南賦稅之繁與歙有富饒之名自昔爲然故凡官于歙者倘惟身圖是便而無愛民之心則未有不侈然志得自矜爲善地者也。若其存心于愛民能潔已勤職則未有不惕然懼夫賦重民困俗悍訟煩而苦于難治者也。虎林高子采夫以

奎文通公集

卷之四

送高判府
宰歙縣序

五

廷試高等除歙令前代除此者非進士不能得亦鮮有以無意得者高子一落落寒儒竟以無意得之此固宰臣之所薦聞

天子之所選用者也其不輕而重也不更較然哉乃吾觀于高子惕然有懼心焉是殆知所以自重而存心于愛民勤職爲能不有其身圖者耶且今日之歙又與昔異兵燹之餘民瘠而不富矣賦絀而猶取盈矣俗習之刁悍益甚而寇賊出沒山谷間未或衰止矣宜高子之弗視爲善地而惕然有懼心也夫雖然以

高子之懼心臨之將惟恐賦重則困吾民而能不以撫字爲催科乎惟恐民窮則迫爲盜而能不以卵翼爲保障乎其所施設措置必卓然有可觀者吾知歛之民其有瘳矣異日者使歛仍不失爲富州而後乃見高子能無負吾

君吾相之特達知遇則又何必以成進士爲榮也高子其勉乎哉

地聖本前賢選人推君相此文章極高處中凡數折而不見虛誦尤爲老氣

陳百史先生評

贈吳江楊邑侯序

楊侯爲晉中儒碩。起家明經。授長興縣二尹。以最聞。擢吳江令。將之任。過余請益。余吳氓也。不能無言。然亦何能自爲言哉。請以古人之箴令者爲侯進可乎。嘗讀唐書元結縣令箴。有曰。爲其動靜。是人禍福。爲其噬吸。作人寒燠。煩則人怨。猛則人懼。勿以賞罰。因其喜怒。太寬則慢。豈能行令。太簡則疎。難與爲政。旣明且斷。直焉無情。清而且惠。果然必行。古今爲令之要。盡此矣。侯持此以書諸紳焉。足矣。客有從旁誚余。

者曰吳江劇邑也。賦役繁重。視他省一大郡。又古平江路爲南北孔道。方今師徒往來。不絕于境。資糧扉履。弗給于供。至胥吏之情僞。百出案牘之雜沓如山。與夫湖濱遺孽。尚有未靖。兵燹殘黎。亟仰雨膏。視他郡諸邑。尤甚難爲理。是子之所當言于侯者。恐未可一端而盡也。而何僅以古之爲箴告也。毋乃非邑人所望于子。請命長吏之意乎。余曰。此余之所以代邑人請命而敢以箴言進也。彼長吏之恣于民上。而惟所欲爲。罔恤民艱者。曾不自知其出一令焉。而可以

禍福人吐一言焉而可以寒燠人于是有失之煩而爲人怨者有失之猛而爲人懼者有失之寬而狐鼠因以縱橫失之簡而政務遂成廢閣者凡若此以之治蕞爾小邑不可況視一郡之大如我邑乎使侯能三復斯箴而凜凜于動靜嗑吸之能爲人禍福寒燠者如此其所關不小也則徵歛必有法而民可不知重賦之困迎勞必有方而民可不知驛騷之苦馭下必嚴以察而閭里不聞有胥吏之呼擾遇事必勤以辦而几案不睹有塵牘之紛紜戢暴安良必種種盡

心以從事而湖濱息鯨鯢之浪中澤免鴻雁之哀曰
明日斷曰清曰惠雖古之號稱循吏者何以加焉如
是而後不辜我邑人喁喁請命長吏之意也余故無
他言而卒以箴言告于侯客乃唯唯而退因書此以
贈侯之行且計侯之必有聽也

送令文此當第一一篇一氣一氣則千萬語如一
句矣得古文之深如此

陳百史先生評

送同鄉諸學博還南序

上御極之五年夏四月詔策天下明經吾浙之貢于

廷者四十有八人。內拔貢生一十八人。爲司文者所拔。士之尤皆魁傑。少年好古。力學以文章意氣自豪者。榜放合有司格三人。其十五人皆除廣文。去歸其里。將行。來就余別。各出自序文一首。請正。余受而讀之。不覺頻足起曰。有是哉。諸子而僅以司訓在也。然司訓而何以幸得諸子也。夫諸子亦知師道之尊乎。亦知師道之所以尊。惟能使學者爲有師乎。昔胡安定

教授湖州東南之士莫不以仁義禮樂爲學致禮部
貢舉歲所得士安定弟子十常居四五其人賢愚皆
循循雅飭其言談舉止遇之不問可知爲先生弟子
其學者相語稱先生不問可知爲胡公也以是學者
有師首稱安定今諸子旣居安定之位而受若事矣
必當以安定之教授湖州者爲學者師使禮樂仁義
蔚然而興而文體之返雅還醇人心之反邪歸正世
道之撥亂爲治胥諸子爲師之責也師道不綦尊哉
若夫及今歲大比奪桂榜魁南宮取巍科高第如拾

芥此諸子章句事耳。不足爲諸子賀也。十五子爲誰。
虎林則江子玉。畏何子又彬。黃子闇。叔葉子月。升茗。
上則沈子丹。穎孫子眉仙。朱子炎。馭吳子問。圓李子。
又喁嘉禾則郁子文韜。勞子雲。將周子采臣。支子惠。
侯及我家劍耿藍珂。一時壇幃相望。化雨繽紛盡在。
吳山越水間。倘異日者諸子之及門。猶得追遡所自。
而相與語曰。憶疇昔里人金某。曾爲文以贈之。有云。
魁傑少年好古。力學以文章意氣自豪者。卽吾師也。
則予有厚幸矣。諸子勉之。

予亦有文遜此簡變而貫

陳百史先生評

送張道先司訓浦江序

昔宋室舉士有明于體用科歐陽永叔嘗薦眉州布衣蘇洵履行純固性識明達論議精于物理而善識變權文章不爲空言而期于有用余讀書至此未嘗不輟卷嘆息以體用兼備如蘇公能知人薦引如歐陽氏而卒不獲竟其大用則亦其命爲之也非學之咎也海虞張生道先名煒如者性穎異髫年餽于庠操履純篤鄙經生家言爲鞿轡而慨然有志實用之學讀書史能詳古人行事本末以推見其當否得失

金文通公集

卷之四

訓補江序

主

每爲人說如身履其間使聽者曉然如目見至兵刑
錢穀有裨民生國用之幾務無不留心體究洞悉端
委殆所謂論議精于物理文章不爲空言者道先庶
幾其有焉顧數奇卒亦困頓諸生今年以歲薦士貢
于

廷除筭之浦江訓或者曰此經濟才也不民社之司而

僅以之秉鐸教士如明于體用之學何余曰否今天
下之鮮吏治由士人之矜犖悅而鮮實學也使道先
于淑人之餘益進其所學而理明氣充將他日無事

不可辨。安在無知人。如歐陽氏者。起而爲之薦引。以
竟其大用。俾天下睹真儒實學之效。爲眉州布衣所
未能得之。遭逢也。道先往矣。惟自信其學而益加懋
勉焉可矣。

每爲人說如身履其間。以評此文。庶幾近之。

陳百

史先生評

送族子劒耿分訓東陽序

昔吾鄉有秉鐸者請益于陽明先生曰敢問教何以哉先生曰其學乎盡吾之所以學者而教行焉耳曰學何以哉先生曰其教乎盡吾之所以教者而學成焉耳若是乎教與學之還相長而未有窮也吾家劒耿子英少聰穎能嚮古力學不專舉學業梯榮進而毅然以文章之道爲已任方日孜孜焉黽勉于學豈暇爲人師耶乃一旦以譽髦之選貢于

廷朝射策夕司教矣行且擁臯比之東陽向余請益余

金文通公集

卷之四

送劔取分
訓東陽序

三

曰吾何以益子哉。子亦服膺陽明先生之言。可已。其
曰盡吾之所以學者而教行焉。則學有未至。教不行
也。不期乎古聖賢之爲學。學未至也。其曰盡吾之所
以教者而學成焉。則教有未至。學不成也。不期乎古
聖賢之所以教。其弟子教未至也。然則何爲古聖賢
之學哉。明倫而已矣。子其務所以明之。而于若臣父
子夫婦長幼朋友之間。能使無一念之或昧其理。則
學至矣。而教有不行焉者乎。然則何爲古聖賢之所
以教其子弟哉。尊經而已矣。子其務所以尊之。而于

易書詩春秋禮樂之義能使無一人之不崇其本則
教至矣而學有不成焉者乎教行學成則子卽不端
舉業而舉業莫大于是矣不梯榮進而榮進亦莫過
于是矣區區文章之道足以竟子之任哉子行矣其
慎無忘陽明先生之言而并爲我諗之汝弟藍珂使
之往訓壽昌亦猶是焉庶幾陽明教學一脉克紹于
我家其爲余之光藉何如也

說得如此鄭重其法更變

陳百史先生評

送朱炎馭司訓新昌序

吳興望族。蓮莊朱氏爲最有中翰。朱襟海先生者。博學篤行。粹乎有道君子也。與先子爲金石交。余少時嘗從先子侍側。襟海先生輒以猶子視余。因邀余館穀。偕其嗣自超。季直千里三君者。讀書山樓。雪案螢窓。勗勉倍至。余與三君意氣相得。猶之先子與襟海先生也。未幾余僥倖一第。而自超以高才鬱其所蓄。不得奮見于時。竟齋志以沒。季直千里皆茂才高等。亦復鍛羽。余因疑仁者有後之說。所謂不發于身必

于其子孫豈虛語耶而博學篤行如襟海先生者既抑其大用又屯其後嗣耶天之難謀抑至此耶今戊子歲吳興有貢于

廷者爲朱子炎馭名奕軒其制舉藝足以芥拾科第而又能爲古文辭有卓然大家之風竊與吾友百史彥升咄咄異之此誰氏子乎詢之乃知爲季直子卽襟海先生之孫也余是以嘆仁者有後非虛語也孰謂博學篤行粹乎有道者而竟無後嗣以大其家聲也顧炎馭方少年其功名之遠大毋論而將來益肆力

于文章其所至又寧可量哉茲以司訓新昌往故爲之述其祖父世誼以見能爲人師者亦必有所自而又以見先子之交友爲能得人如此試以質之季直千里兩君余言妄乎否也

尚須多爲辭說否前則永叔後則震川矣

陳百史

先生評

送陳心簡南歸序

余同官陳百史先生長子心簡。偕余兒世漢。並徵入侍異數。奉

詔來京。繼而有出佐州郡之命。韎韐負劒趨走。

天子之廷者。將一旦側身懾息于州郡長吏之前。或者疑之曰。如異數何。余曰。此乃所以爲。

朝廷之異數也。蓋不欲卿大夫子弟鮮衣怒馬。執袴相矜。耗其精力於衣服飲食間。而令之親近小民。曉習吏務。庶幾與制科選舉並收得人之實用也。又恐驟

然握符綰綬而臨于民上。簿書錢穀之鞅掌。未嘗肯
綮一試。輒蹶不若姑令之貳于長吏。某也得可爲法
某也失。可爲戒。庶幾奮發砥礪他日者。必有良二千
石與賢刺史出于其間也。又恐年幼子弟以不學未
成之才。而槩令服官。鮮不冥冥從事。非國家愛養人
材至意。于是年不滿二旬者。姑緩除授。俾得承父兄
之訓。資師友之功。充其學問。而後試以吏治。庶免不
學無術之譏也。嗚呼。此非

朝廷之異數而何哉。心簡與余兒皆在緩除之列。願余

兒質魯未學。余又弗能教。惴惴焉流光易逝。有辜異數。而心簡性穎異。開卷海納。百史先生肆力於文章政事之學。所以教子者。又有其傳。我知其必能讀父書以答。

君恩也。今心簡以將母南歸。故于其行也。告以朝廷之異數。乃若此。而又非獨爲心簡告也。

長者一言勝橐金十倍。且世世寶之。永以爲訓。

陳

百史先生評

金文通公集

卷之四

送陳心簡南歸序

夫

贈太學張生三省序

今日之爲制舉執者浮靡佻詭不可方物求其一遵格律近于先正者鮮矣進而求之古文詞知所宗嚮不惑時趨者什不得一焉又進而求之考亭南軒陽明龍溪明理究性之學能窺其藩籬望其津涯者千百不得一焉豈世無師法歟抑學徒之狃于習俗溺而忘返卽有其人焉作則于上而莫之應歟以余觀于太學張生殆卓然特立之士也其爲舉子業則痛剗惡習有先正遺意其爲古文詞所嚮慕而效法者

韓歐大家古今文兼得所宗。可謂難矣。而尤篤志學。聖賢之道。會司成胡孝緒先生倡導理學。一時學者。有師獨張生聽受之餘。論議娓娓。多所發明。輒令先生解頤。嗟乎。有學人若此。又奚患師法之不尊。且信而有其作之。莫或應哉。然則張生將不獨以文名世。僅博科第爲榮。而能嗜聖賢之學。日進不怠。其正未可量也已。張生名三省。禾郡長水人也。以吾鄉而有此卓然特立之士。且于余有一日之長。故喜而爲之贈。因以勉之。

此今日韓子也能自任能予人地步

陳百史先生
証

贈處士沈元子序

明初有豫章鄭士亨者。能爲文。劉誠意與爲忘年交。有東游集行于世。而誠意序之曰。近世之爲文。非達官貴人。及善諛。不諧于時。士亨不能諛。又不仕。故不敢以文示人。而自以爲賢于博奕書而藏之。或獲傳于後世。則亦可以懲創感發。不爲無益。而不悖乎古聖賢之意。雖不望其必傳。而亦未嘗不欲其傳也。余讀其言。不覺輟卷歎息。有是哉。士之能爲文者。不仕又不善諛。則諧時之難也。然文之能爲可傳者。又豈

金匱通公集

卷之四

元子序

三

以其不仕不善腴而遂莫之或傳也耶吾友沈元子
骭髀歷落不事家人生產自少喜讀書博學彊記凡
經史子集百家之說無不記覽通達而尤喜言史事
每舉一代必能詳其君臣行事得失以推見當時治
亂興衰之由每指一人必能究論其生平本末如身
接目睹大節瑣行罔有毫髮遺漏所謂終歲讀史不
如一日聞公論者元子有焉至其爲文則能嚮慕史
漢韓歐卓然不詭其爲詩詞儼追作者之林嗚呼元
子抱所學以遍歷吳楚越閩燕趙齊魯之墟者三十

餘年故聞見日益廣著作日益進每酒酣慷慨仰天
摩腹恨不爲達官貴人又恨不能善諛逢時而其意
雖不望其所著必傳實未嘗不欲其傳竊與古人同
之也然世之知元子而好其所爲詩文者不獨余一
人則雖欲不傳而不可得已今元子又將自燕南還
因序以送之且勗其自爲可傳者

於贊述斟酌於援引切近於感慨蘊深古文得此

起敝扶衰矣

陳百史先生評

贈星士吳碩甫序

命之爲言。余初不之信也。讀易之乾。知進而不知退。知存而不知亡。知得而不知喪。而惕然於悔之集也。因恍然於命之說也。夫進退存亡得喪之生于時者。未始不根于命。惟不知命。故違時違時而悔吝憂虞。動與之偕。命何可以不知哉。獨術士家之言命也。勸人進。不勸人退。譽人存。不惕人亡。動人得不戒人喪。談命者愈妄。命之理愈隱。百求一中焉。無有也。有告余者曰。若之吳碩甫。其言命也。根於易。與術士不同。

余進而與談則深得乎進退存亡得喪之旨而果非術者言也士大夫之讀易者知必有當於碩甫

贈名醫張君慎初序

嘗讀沈亞之表醫者郭常卻估所酬錢五十萬曰販
賈之人細度而狹見終日計量于毫銖之間所入不
能補其望今暴奪之息財五十萬則必追悵鬱惋寧
能離其心且病新去而六腑方憊復有悒然之氣自
內而伐卽不可救奈何彼方有疾時知我能治而告
我我幸免之因利其財又使其死余不覺廢卷而嘆
世有醫而存心若此真足表也夫醫者卽能察病之
脉理而不能審人之性情卽能審人之性情而君功

取償之念未免橫據于中。以是求藥到卽已病病已。不復作詎可得哉。溧陽張君慎初。醫震江南。余友陳百史丁亥夏忽病嘔致失聲。長安諸醫莫能治。特邀張君來京。曰勿憂病可去也。尋果愈。張君之名遂益噪都市。余有兒患脾症。寒熱交作。病勢頗亟。他醫以爲傷寒也。非旦夕可療。趣張君診之。云脾胃勞倦絕無外感。兩劑當愈。卽不須藥。一如其言。余謂調理之劑或不可少。張君哂曰。藥以治病。中病卽止。若病已而又滋以草木之味。無論剛柔補洩。未有不反傷。

元氣者也。余驚問百史。張君術何以至此。百史曰。是非可倖而致也。其祖望溪公。素冠岐黃。爲金沙王宇泰先生所器重。父景溪公繼其業。又與名醫繆慕臺交往契善。伯仲一時。至慎初克紹家傳。而生平存心。又以輕財濟人爲務。如郭常之卻估客酬金者。不可枚舉。術烏得而不至此也。余嘆服不已。因爲之序而表之。且以見輕利者之能濟世而垂名。匪特醫爲然也。

序張君而一時交情俱見。步步追合古人。

陳百史先生評

贈圓通寺寓僧竹憨序

黃魯直云。士大夫惟俗不可醫。余謂人。不論貴賤窮通。均之不可以俗也。然盡天下之人而貌之。皆猶是髮聳而眉低。目縱而鼻橫。俗不俗。亦幾淆然而莫辨。則于清氣之存不存焉。辨之也。乾坤有清氣。散之而爲江山雲樹。否則天地亦塊然而頑者矣。人心有清氣。發之而爲圖書吟嘯。否則人亦禽息獸視。與木偶等矣。余病起無聊。思得一不俗之人而與之談。客有言于予者曰。潯水之圓通菴。有一寓僧。非禪非教。亦

金文通公集

卷之四

則隱
僧竹
懸序

三

酒亦肉而口吟筆繪終日嗤嗤慙慙潦倒墨汁間是
殆有異焉者也余亟邀之至未交一語而清氣映人
眉宇間見余案頭有紙數幅謂余曰汝能醉我我當
爲汝染此紙趣呼酒來便伸紙仰天大笑右手執筆
左手持巨觥口喃喃不知其所言目睛輪轉不知其
所視須臾酒盡腕發潑墨如風雨走筆如千軍萬馬
左衝右突而山水花鳥竹木雲物之類靡不一一各
臻其妙如文與可之竹皆有成竹于胸中異哉技乃
至此乎而尤善書書不摹晉而手骨儼然而尤善詩

詩不襲唐而聲氣適然。古來能畫者不必能書。能書者不必能詩。得其一而精之已足以噴薄清氣浣盡俗髓。而況乎兼之者也。此不惟可以療頭陀之俗。兼可以瘳士大夫之俗者也。雖然余嘗察其酒闌停筆後。痛罵近日打人之禪。與課誦之教。而時以片語逗禪教合一之旨。微乎微乎。殆未可以能畫能書能詩。遽窺其涯畧者乎。余樂與之遊而不倦。因爲之識其梗概如此。僧號竹憨。或曰卽松陵人氏也。

金文通公集卷之五目錄

吳江金之俊豈凡著

賀大宗伯胡菊翁先生晉秩并介壽序

壽王貴真先生七袞序

祝方伯陸中台暨夫人王氏七袞雙壽序

壽大司寇少傅瀛洲劉公序

祝介存趙公暨配顧孺人六袞雙壽序

壽柯太翁楚衡先生六袞序

壽姜封翁紫環先生六袞序

壽少司馬李梅公先生七袞序

賀大中丞心康韓公祖榮壽序

祝壽民佟公祖五袞誕序

祝介存趙公七袞壽序

壽李母宋太夫人七袞有八序

祝李母戴太夫人八袞序

壽胡母張太夫人六袞序

壽張母馮太夫人七袞有七序

金文通公集卷之五

吳江金之俊豈凡著

賀大宗伯胡菊翁先生晉秩并介壽序

古者賢公卿所爲享大名顯當代而聲施後世流聞
無窮者非徒以其秩位之崇隆也必有涵泳古今發
舒川嶽之才以彰其靈異必有收攬英雋楷模後學
之識以尊其師說必有純孝懿節常變弗渝之操以

敦其根本。必有制禮作樂。坊民易俗之業。以黼黻乎
治平。而恢張其作用。又必有致虛守靜。歸根復命之
學。以洞燭夫吉凶憂患之數。而超然自得于進退存
亡之外。合是數者。以求其人。殆不數數見也。茲于吾
菊翁先生見之矣。先生產西蜀。臞骨峻峻。峨眉雲棧
之嶽崎也。靈襟灑灑。瞿塘灩澦之蕩滌也。文心磊砢
而多姿。司馬三蘇氏之雄偉奇宕也。嘗讀其譯峩巖
甄奧賦。舉全蜀之山川人物。爲之盡開生面。長楊上
林。未足多也。先生其一代之文人乎。先生起家翰苑。

宗匠海內。往者一較南宮。一典浙闡。至今借才異代。中外林立。

龍飛酉戌間。遷學士爲三館師。典型屹然。先生其一代之師模乎。戊子冬。聞太夫人變。傷心亂離。倍篤孺慕。奉

溫詔。宅憂京邸。如生如存。爲定爲省。晨夕靡有寧居。先生其一代之純孝乎。辛卯三月起佐典禮。是時

皇上復辟之初。邦禮繁重。得先生悉襄厥成。今春知貢舉。甫撤棘。卽有大宗伯之命。蓋

聖天子銳意禮樂之興。不待百年。行將辨等威。易章服。以定民志。而一海宇。非夙夜寅清之先生。不可。先生其一代之秩宗乎。余又嘗讀先生原易。夢易二編。發前人未發之秘。直欲起義聖而晤對。討論于一晝。未剖混乎太極之始。宜其歷吉凶而恒凜。蒙憂患而不惕也。先生其一代之至人乎。古者享大名。顯當代之賢公卿。炳美史冊者。其何以加焉。抑吾又聞之。先生嘗泊舟巫峽。遇異人。授素書。其秘雖不盡宣。然先生年及耳順。紫氣皓彩。勃溢方瞳。眉宇間。當必有進于

保合太和。各正性命之旨。豈止從棗花桃核得赤松黃石之符已哉。今孟夏二日。爲先生初度。又適屆新曆。

簡命之期。凡蜀之士大夫仕于朝者。謀所以祝之。而徵言于余。余何能文。其亦以仰止佩服之私。聊叙先生之概。而因以見先生之所爲可祝者。蓋非一端也。

方是胡先生文字入壽一則。不借外來語。尤爲合

拍。
陳百史先生評

壽王貴真先生七袞序

歲壬辰王正二十有九日。爲大金吾文孫王公太翁
貴真先生七袞懸弧之辰。維時繞膝稱觴者。女甥而
外。子若孫以暨孫之子。凡九人焉。或秩晉官階。或職
司專閫。或發軔于李官。或蜚聲于辟雍。簪紱之盛。天
倫之樂。爲一時中外所艷稱。于是朝列諸大夫爭執
爵介壽而徵言于余。以余與先生之長君大金吾同
朝八載。相得甚歡。習知先生之德厚流光。有爲之後
者矣。又以余與先生之尊人大冢宰射翁先後起家

中翰猶及觀其立朝丰采。山卿貳游陟公孤道德事
業炳赫前代。習知先生之家世淵源有爲之先者矣。
夫有爲之先者則先生之獲佑于天不自其身始也。
而況及其身乎。夫有爲之後者則先生之集福于世。
又不自其身止也。而況當其身乎。余請得而申言之。
先生少讀父書。能文章。藉藉蠻序間。凡入入棘闈。弗
得志于有司。會太宰公以勛秩並懋。得文武廕。先生
長應襲。讓不就。以明經訓廬江之合肥。敦崇教化。造
就人才。至今淝庠稱有師。首先生焉。尋擢雲中廣靈。

令所以治民者。一如其塋士。不媿古循良吏。因念太宰公春秋高。遂乞終養。繼以讀禮故。哀毀逾節。竟失明。入

清朝。以覃恩晉封如子官。目忽重明。人咸謂先生純孝之報云。然則太宰公之豐功偉伐。當年食報未盡者。既留餘以遺之先生。大金吾之克振箕裘。今日履綏方茂者。又輻輳以致之先生。而先生以一生苦志績學。僅奮跡明經。終其身爲賢邑宰而止。辭延世之榮。膺追孺慕之高風。是先生之取諸天者。嗇矣。宜如

何以豐其報。先生之積諸躬者備矣。宜如何以彰其應。則三多九如之頌未足爲先生侈也。亦曰觀于其爲之先者爲之後者。併先生所以居先後之間者。而先生之遐算未有卜已。諸大夫皆曰善。遂以是爲先生觴。

涪庠稱有師及不愧循吏贊歎王公只數語耳。若俗手便衍作數十行矣。此文章簡妙處。王司馬號雄于文者。四部稿中作徐太僕序云。內有真際外無真境。張肖甫云。境有所未至。調有所未安。史漢

之文恐無此等句法讀此文詳畧而不以爲史漢
之文必不知文者也

陳百史先生評

祝方伯陸中台暨夫人王氏七袞雙壽序

順治十有二年歲乙未中冬長至日余年家子陸紫
電青卽伯仲兩孝廉爲其尊人中台方伯公暨夫人
王氏俱于明年丙申歲登七袞雙壽預徵余一言爲
祝蓋謂余與公生同里仕同籍齒又肩隨凡四十年
間相與踐歷中外飽升沉閱滄桑而歸然獨存者通
郡止我兩人習之久則知之真知之真則祝之爲詞
也必實而不誣此兩孝廉屬余之意甚勤懇哉余雖
不工華封言其何能辭憶公起家水部郎以至累官

大方伯其存心制行及施于有政則公之所以致祝于人者蓋非一日矣請得而頌其實可乎公初任權荆關時楚雖全盛會奢酋叛蜀商旅之出蜀者頗嬰艱阻公一以寬簡恤之而荆商祝迨尚書郎秩滿出守福州廉平著聲而福民祝尋以太守卓異叅藩兩浙惠澤淪濡猶之守福而浙民祝繼秉藩臬于蜀豫晉趙所至見德所去見思爭爲畫象立祠而蜀豫晉趙之兵若民無不祝時嚴疆亟需樞督群推轂公公獨念兩尊人春秋高堅請終養遂棄軒冕若敝屣自

是跼伏田間。婆娑澗谷。日與麗眉父老鳩筇倚徙。未
嘗一厠跡公門。其有族屬三黨。力不能婚嫁肄塾者。
公悉緩急之。無稍吝。而宗族戚里之人。無不祝。故曰。
公之所以致祝于人者。洵非一日也。宜乎景福駢臻。
休嘉萃集。有夫人焉。齊眉黃髮。冀缺梁鴻。未方其匹。
有子若孫焉。聯芳接武。五桂三槐。罕儷其儔。孫又有
子焉。如蘭之抽。如玉之茁。而繩繩乎未艾。每至鷄鳴。
問寢環榻相向。纍然莫辯。誰何猗歟盛哉。華封之言。
公備有其事矣。余更進何辭。以爲祝哉。雖然。余嘗讀

陶靖節詩而乃知所以祝公矣。靖節有詩曰：嘯傲東軒下，聊復得此生。善夫！此生之得，顧在嘯傲東軒下也。今夫人盡有生，或相馳相逐于利祿名譽之場，而勞其心，焦其思，或相傾相軋于戈矛劒戟之內，而撓其寧，滑其和，肺腸不爲已有耳。目盡爲人役，則此生之失而不能得也，比比是矣。公自抽簪解組以來，嘯傲東軒，將踰二紀。方且視天地如芻狗，萬物如蜩翼，世事如傀儡，求所爲，勞其心，焦其思者，無有也。撓其寧，滑其和者，無有也。惟以清泉白石，好鳥時花爲娛。

視悅聽之具。墳典丘索。子史百家。旁及竺氏書。爲怡情養性之資。彼五賊七繫。爲吾生之蠹者。公悉有以杜之。公真可謂得此生矣。昔彭商得之。而歷算八百。子房得之。而友赤松。四皓得之。而採芝商山。鄴侯得之。而白衣帝側。凡皆以得此生也。以此祝公。庶幾其實而不誣。有以答兩孝廉殷勤屬余之意乎。余羈跡燕邸。弗獲偕同里姻朋。躋公之堂。親捧雙爵以進。敬南向拜手。而高吟靖節之詩云。

壽大司寇少傅瀛洲劉公序

今上十有三年丙申七月二十九日。爲大司寇少傅瀛洲劉公六袞有三懸弧之辰。公屬下諸君謀所以祝公者。而徵言于余。謂余與公同朝最久。且公貳司空時。嘗與余同官。習公爲最深。庶幾其言之或有當也。余又何敢以不文辭。顧余無暇繁稱公之生平。效世人歌詩介祉。綴諛詞以進。竊就公今日之爲司寇。有合于睿論仁壽之說者。敬陳一二質言。爲公致祝可乎。我

皇上堯仁如天。惟刑之恤。念人命至重。死者不可復生。斷者不可復屬。非得廉明公正。謹厚寬平之君子。無以除酷吏刻深之習。而消陰陽沴盪之災。遍察廷臣。中惟公克勝厥任。乃公自膺

簡命。來日以

聖主好生之心。爲心。每慮一囚反覆。服念務于詳微。遇有寃抑。則亟起而奮筆理之。如拯溺救焚之不遑。再計萬一情窮于法。開釋無路。則爲之展案咨嗟。觀其容。嘗累口愁慘不舒。以故公所全活者甚衆。人多莫

之知。而所屬諸司亦皆以公仰體。

聖主好生之心爲心。故一時司寇之堂。多良平稱職。獄少寬濫。爲中外所艷稱云。昔定國父于公。閭門壞。父老共治之。于公曰。少高大門閭。令容駟馬高蓋車。我治獄多陰德。子孫必有興者。又歐陽永叔之父崇公。嘗夜燭治官書。屢廢而歎。母問之。則曰。此重獄也。求其生不得耳。求其生而不得。則囚與我皆無恨也。母告永叔曰。其心厚于仁者。吾知汝父之必將有後也。嗚呼。公治獄多陰德。有類于公。心厚于仁。有類歐陽。

崇公是以天道福善。今古不爽。公中年尚艱嗣。迨年
近六旬。連舉丈夫子三。皆生而岐嶷。穎異不凡。所謂
子孫必興仁者。有後直。參而取之耳。他日卿相接踵。
朱紫盈庭。公泰然食于歐二公之報。由耆而耄。由耄
而耄。而期頤而大齊。固其所矣。又何必覓三芝。問五
石。進淇厓。安期羨門之徒。而與之役金童。驅姮女。希
養生家之大還。久視哉。故曰公之爲司寇也。有合于
魯論仁壽之說。壽其國。迓無疆之祚也。壽其民。遊化
日之長也。皆仁者所以自壽也。請以是祝公可乎。諸

君曰可矣。遂相與捧爵而前。

祝介存趙公暨配顧孺人六袞雙壽序

順治丙申嘉平月。爲吾邑前行取惠安令介存趙公。暨配孺人顧氏。六袞雙壽。其仲子中翰君元康諱申。所者。何余請曰。吾父吾母。皆欣逢初度之辰。所以書生新繫職守。日珥筆從木天諸公後。躑躅瀛洲亭畔。弗獲馳歸里門。偕吾兄弟子姪。拜舞一堂。捧二人觴。竊念吾王大父而下。與先生世好。勿替願惠之一言。郵而致之。以逭吾不遑將父將母之愆。余曰。微君請。余固不能已于言也。度君家之戚里族黨。誇耀其詞。

章效華封人三祝以進者。夫且塞耳炫目更何俟。余言。余第言公與孺人之所以宜壽者。政未可量而已。憶余垂髫時。卽獲交于太翁伯。雖先生文章知己。相得歡甚。繼余入仕版。始與公交。因而知公最悉。當丙辰闈難突發。太翁忍冤不自伸。公時方弱冠。有傑士名。徒跣入京。百計護之以歸。嗣太翁授經西湖。及門之盛。逾于安定。已而師說彌尊且廣。又布席燕晉魯衛宋趙間。凡太翁所之。公皆從焉。蓋遊學其名而侍省其實也。丁卯公奏賢書。未幾太翁又以名盛被誣。

幾罹不測。時厰衛邏卒甚嚴。卽長安一二知交莫敢
援手。公日夜號泣都市。見者聞者靡不流涕。乃所司
阿權要意。將深文羅織。公曰。我丈夫也。獨不能爲緹
縈女子乎。于是灑血伏奏。惻然動上心。事乃得解。太
翁不幸而負此奇冤。又何大幸而賴有此令子也。丁
丑公成進士。適值太翁花甲初週。錦歸侑觴。剝極而
復。一時艷爲盛事云。公初仕令長沙。遘太翁艱。再任
補惠安。兩地俱以最報。天官考績。贈太翁如公官。甫
啓事爲行取冠。會鼎革中。寢時南中屢勤徵召。公堅

臥不應。夫松栢之歷千百歲而不與萬卉俱剝落者。以其飽霜雪。謝華郁。根莖枝葉皆含苦味。故植本貞固。卒享大年。今公之篤摯于天性而歷盡艱辛。絕意于仕宦而遺榮若浼。不啻飽霜雪。謝華郁而植本貞固之松栢也。此公之所以宜壽者。政未可量也。公配孺人顧氏。出自我吳望族。閭德醇備。大家之慧歟。孟光之順歟。鄧曼之能而孟母之嚴歟。敬姜之勤約而叔敖母之仁慈歟。無不該而有之。當公周旋太翁于患難之時。四方奔馳不遑。內顧孺人事姑。願事祖姑。

皇甫盡志盡物。咸得歡心。以至居妯娌。待姬媵。課兒女。御內外。臧獲。嗃嗃。雍雍。整若朝典。真所謂婦道而兼子道。母道而兼父道者哉。近且虔事薄伽。棲神極樂。置家事不復問。然則孺人之茹苦遺榮。而植本貞固。亦猶之乎公也。此孺人之所以宜壽者。政未可量也。而況子若孫。繩繩兮。振振兮。或綰綬承明之廷。或蜚聲藝林之圃。科名克紹。前武勛業。聿彰後昆。則子若孫所以致公與孺人之宜壽者。又豈有量也。余之所爲祝者。如此。不敢有溢詞于其間。請元康甫此以

質之兩尊人其必燦然色喜而爲之連舉雙爵乎

壽柯太翁楚衡先生六袞序

順治十有三年歲次丙申嘉平朔爲給諫柯君太翁
楚衡公懸弧之辰適當甲子一週孫蘭繞膝琴瑟齊
眉鄉邦榮之比給諫君荷

聖明臨軒親擢畀以獻納重寄方任天下之責議天下
之事將日立

殿陛之前與

天子衡是非與九卿百執事爭當否得失弗獲暫請休
沐馳歸捧觴不禁雲樹依依一時同里姻友官長安

者皆以給諫君遙祝太翁之心爲心。謀介詞以致之。而謬屬於余。余與太翁夙附梓戚。凡太翁立身制行。宦遊里居。卓然爲物望所歸者。得之見聞。頗真誼。何能辭請先言太翁之所以自爲壽者。徵其理之不爽。如日方升。政未可量。而後言給諫君之所以爲太翁壽者。非復世俗之壽其親可比也。太翁弱冠登賢書。屢躋公車。爲孝廉。十有六載。閭戶讀書。足跡不接官府。惟爲善於鄉。如恐不及。粥饑者。衣凍者。療病者。櫬骼者。扶良獎善。排難解紛。鄭公之號。可以稱鄉彥方。

之名。至於化盜。則太翁天性仁厚。不受人損。其所以
自爲壽者一也。成進士。觀政京邸。聞其尊人微恙。輒
潛然曰。功名本爲榮親。親有疾。忍弗顧乎。遽策蹇歸。
周旋牀下。奉侍藥餌。溽暑中蚊蚋攢肌。目不交睫。未
嘗刻懈。於是通國以純孝稱。無間於其戚里族黨。則
太翁克全百行之首。宜享天佑。其所以自爲壽者二
也。司李建寧。務寬大廉靜。與民休息。不以威稜鋹急。
博風力名。讞獄遇有矜疑。必宛轉求生。或伏其辜。必
歛歔累日。于公之陰德不疑之平反。張廷尉之不寬。

太翁皆有焉。攝郡邑符所在見德。所去見思。臺使者
交章推轂。行取第一。歸之日。清風兩袖。圖書數卷。建
寧父老。遮道攀轅。爭爲畫像立祀。至今尸祝不衰。此
太翁之福澤及民。其所以自爲壽者三也。會寇亂。絕
意仕進。躬耕著書。吟咏竟日。一切榮祿寵利。馳騖紛
擾。劇情斧性之具。廓然無有。及給諫君成已丑進士。
除棗令。太翁欣然曰。親民之官。行善種德爲最便。貽
書諄囑。潔已愛民而外。語不及他。給諫君佩服義方。
遂爲循吏冠。叨

賜衣異數。特簡今官。則太翁之提躬訓子。一軌於道德
仁義。其所以自爲壽者四也。歲辛卯大祲。邑之同善
鄉先生。經畫賑濟。不遺餘力。全活饑民無算。舉青州
遺法。義田良規。一一徧而行之。則太翁旣已積厚流
光。乃流愈光。而積之彌厚。其所以自爲壽者五也。若
夫給諫君之所以壽其親者。余更得而申言之。今
天子圖治若渴。欲聞正議。而受讜言。以計安黎庶。卽古
帝王懸輶止輦。蔑以加矣。給諫君抒忠殫赤。仰報
聖明特達之知行。且建一議。而造四海無疆之福。規一

事而貽

朝廷萬世之利於以凝嘏集祉於太翁豈猶夫盛陳筐
篚玉帛虔修醴齋鼎牲徒爲繁縟靡文以介壽高堂
誇榮里閭已哉故曰太翁之自爲壽者理有不爽政
未可量而給諫君之所以爲太翁壽洵非世俗之壽
其親者可得而比擬萬一也長安諸縉紳先生聞余
言唯唯曰此以質言祝非以諛言祝也殆祝之善者
也敬南嚮拜首而爲太翁與太母俞孺人遙進雙爵
焉

壽姜封翁紫環先生六袞序

順治十有五年歲在戊戌。王正朔日。爲吾浙會稽姜封翁紫環先生六袞懸弧之辰。其嗣給諫君定庵。方晨夕出入瑣闥。爲

聖天子獻可替否。弗獲暫請休沐。馳歸捧觴。乃預期徵燕邸名公卿。賡詞致祝。而謬屬余爲之序。余何能文。雖然。誼不可以辭也。憶余初登仕版。備員薇省。時先生太翁大宗伯公。方爲史官。恒望見丰采。與聞議論。卓哉鄉國儀型。及余徙南禮曹。又與先生季父方伯

公同官甚善。故余雖未獲交于先生。竊耳熟宗伯公之有令子。方伯公之有小阮。而私心嚮往。非一日矣。余固稔知先生之爲人也。植根貞固。爲震風凌雨之所不能撼。敷榦華滋。爲苦霧嚴霜之所不能摧。如青松茂栢。蔚然挺立于群木萬卉中。其將來之飽寒暑。歷歲月而未可以限量。卜算者蓋有其自也。請得而申言之。先生幼而岐嶷。弱冠補博士弟子員。爲諸生祭酒。名稱藉甚一時。癸酉丙子兩闈。皆擬冠軍。會當事者以被嫌抑之。先生泊如也。退而績文著書。深造

益力。藝苑騷壇。首執牛耳。此先生以屢試屢蹶。老其材。充其識。而非若春葩之艷。一發無餘液者也。顧先生所不得志于有司者。帖括小技耳。至于經世遠猷。填胸塞臆。凡古今成敗得失之由。與夫關塞險阨之勢。士馬強弱虛實之數。以及河渠兵農之利病竅會。靡不燭照而數計。時明季春春多故。需才方殷。宗伯公因勸之仕。曰。汝勿以負所學者負當世。先生于是出而小就。補大中丞幕。旋以譽望擢起部郎。凡所營建。征繕有方。中上旨。書名屏間。旋遣視北河。適河涸。

漕滯漕河重臣咸束手靡措先生了然有成竹于胸中爲遡泉源濬衛水以濟輸輓無阻衛河分司之設自先生始已卯庚辰間齊豫大饑道殣相望先生特爲捐貲賑救太君錢安人復脫簪珥佐之全活饑民無算荒政之善無異富鄭公之于青州也自癸未讀禮歸遂賦考槃無復用世意矣此先生以無所不能之用小用輒效而試其小用卒藏其大用彌綸事業卷而懷之一室福澤顯榮留以貽之後人又非若秋實之盈候至氣足而易歸隕落者也乃先生則更有

其至焉。而曷乎不可及者。當宗伯公曳履承明。以逮
晉秩典禮。強半優游朝署。先生獨侍王母太夫人于
家。泔灑醲臠之奉。罔不勤恪其代。宗伯公將母而曲
盡爲孫之道者。若此。迨萱幃鶴馭。宗伯公高年離索。
未免傷情。而先生竭力承歡。盡志盡物。至于周旋患
難。須臾勿間。幾忘其爲滄桑之苦。先生之曲盡子道
者。若此。歲壬午。先生官張秋。是年冬。濟南失守。有叔
以藩幕殉。乃于阼離中。多方援孀氏出。又護其孽。
歸嗣課讀如已子。今且崢嶸爲宗祀光矣。先生之篤

于本支而能扶存。亾繼絕之義者。又若此先生世承
清白家。日貧庭訓愈嚴。給諫君綰綬五鹿。惟貽書勵
以廉且慈。慎勿念我二人甘旨。故稍有失墜。今給諫
君以循良異等膺

特簡。著聲掖垣。先生之能教其子以有成。而克盡父道
者。又若此。是皆人所不可及。而先生之所以自爲壽
也。若夫給諫君之所以壽先生者。余更得而頌之前。
詰有云。公論國之元氣也。給諫君以光明俊偉之品。
翊平康正直之運。抒公論而培元氣。俾君德清明。庶

務修舉以保我子孫黎民而君壽而民壽而國與天下似蒙其壽夫以壽君壽民壽國與天下者壽其親則爲之親者第遽遽然衍衍然逍遙于宛委若耶之間婆娑于紅茵翠幄之下以詠化日而樂大年又何必餌黃獨飯青精餐沆瀣服刀圭吸日引月熊經鳥伸義彼洪崖安期僊佺之流哉余故曰先生之爲人也植根貞固敷幹華滋有如青松茂栢之挺出于群木萬卉中其爲壽也烏可以限量卜算然則先生花甲初周與太君錢安人舉案齊慶其猶嬰之未孩也

夫。

壽少司馬李梅公先生七袞序

今上龍飛之三年歲次甲辰。仲冬十有四日。爲豫章少司馬梅公李先生七袞攬揆之辰。其兩嗣君文學維介。孝廉維饒。不遠數千里。馳使致詞。徵余言爲壽。蓋謂余與先生皆以患難餘息委身。

本朝共事歷有年所。相得甚歡。凡先生之立身本末。居官梗槩。所以凝麻襲慶。享有純嘏者。惟予習之最深。知之最悉。余又何能以不文辭也。先生起家大行。著望輶軒。會丙寅丁卯間。瑠瑱薰天之日。抗節沮祠。繼

而澄清流品。聲震典銓。其貞松勁栢。耐寒暑而傲霜。雪不與萬木群。卉同其榮落之象。固已想見一班矣。更以余所得之朝夕周旋。而益信先生之存心制行。偉績高風。有合于天地悠久之道者。宜先生之膺壽無疆也。請爲之申其說可乎。憶甲申歲。

本朝入主函夏。時方經營草昧。盡人得効。勦莠佐石畫。先生由同卿歷奉常。每發一議。弘博長厚。有裨開國規模。一時三事大夫。暨百執事。爭心折之。已而余承乏中樞。先生亦游陟樞右。凡所爲招攜懷貳。仰宣

朝廷威德以收賓服遐荒之效者惟先生是賴。蓋先生于山川險易敵情虛實人心向背之故靡不燭照而數計。故羽書沓至。余方注思而先生已脫于口。余甫啓口而先生已逼于腕。舉折衝遠畧濡毫立就。俾余得拱手受成而幸。追官謗者皆先生之賜也。此先生正色立朝之日。不沾沾規目前而惟爲

國家計久遠。其有合于天地悠久之道者。宜壽一也。逮宦海忽波。卽夙夜飲水如先生。幾不免顛躓者。再卒之風回波靜。水落石出于先生。無毫末之損而反有

丘山之重。自是抽簪解組。嘯傲江山。中外之屬望。雖
殷。先生之肥遯。愈堅矣。惟以清泉白石。好鳥時花。爲
娛悅視聽之具。而耳目不爲人役也。讀書賦詩。訓子
謬孫。爲怡養天和之資。而肺腸盡爲已有也。此先生
高臥東山之日。已曠觀天地如芻狗。萬物如蜩翼。世
事如傀儡。求所爲。嚮寧斧性者。毫無有焉。其有合于
天地悠久之道者。又宜壽一也。至于先生賦性孝友。
宅衷仁厚。春風與物。秋氣禔躬。爲善惟日不足。德人
惟恐人知。此皆天地悠久之道。綿亘于先生之舉心。

動念間其爲壽考無彊又非止一端而已也。若夫仁人有後兩嗣君聯芳接武克紹勲名以爲先生添籌無算者余又何能測其限量哉。請以是捧觴而進。

賀大中丞心康韓公祖榮壽序

大中丞韓公撫吾吳之八載。賦役寬平。訟獄簡息。于時東海無波。梯航日至。軍旅鮮征。調之驛騷。萑蒲無伏莽之嘯聚。地方享綏靖之福。

朝廷紆南顧之憂。皆我公之賜也。惟公秉鉞樹旄。專制一方。不恃高巍之勢。不行赫濯之令。有大事則與地方有司及郡邑紳士父老再三籌度。必無貽後憂。無擾百姓。乃可有重賦重役。則酌年歲之豐凶。與民生之勞逸。量其緩急。審其先後。無後公輸無竭民膏。乃

可傳曰以厥庶民暨厥臣達大家以厥臣達王無胥
戕無胥虐引養引恬又曰不競不休不剛不柔敷政
優優又曰不侮鰥寡不畏強禦其公撫吳之謂矣朕
則我公治效之在吳者非徼一時道路之譽非侈旦
夕粉飾之觀而實心實政皆瀝血抒誠爲小民養康
樂之神俾遊化日之長爲

宗社培植悠久之脉用迓無疆之庥謂宜晉階久任如往
昔周文襄故事庶幾壽國壽民爲世道人心一大愉
快乎不意公且將一旦去吳也我儕百萬吳僮如赤

子脫慈母之懷。不勝纏綿涕戀。正莫解其尸祝無已之忱。而適屆公嵩誕之期。其能無一言介觴以進乎。雖狀余不敢賦南山之章。侈北斗之咏。以華祝浮詞。溷瀆清聽也。止述公治績之彰彰在吳者。爲公觴焉。三吳財賦。實甲海內。卽以輸粟太倉言之。蘇松諸郡。轉漕數百萬。當楚浙豫章三省之半。又未免水旱爲災。而公爲之鼓其樂輸。清其耗贈。歲歲無後時無缺額。三吳之風習俗。抗敝。鴛鴦。宄詐之徒。逞刁滋訟。大爲良民蝨賊。公爲之鋤其奸首。息其牽累。而俗賴以

醇。先是海氛未靖。征調繁興。師旅往來。靡有寧止。而
且湖寇伺隙。往往攘臂晝嘯。公爲之清其擾害。嚴其
保甲。而居者行者。皆獲息肩。至于公勤勞政事。凡諸
司文案。不啻海積山堆。皆詳加搜閱。每徹宵旦。無聲
色之好。絕燕閒之娛。潔已愛民。矢心報國。凡若此者。
皆公所以下養小民。康樂之神。而以壽民者。自壽其
身上。培。

宗。社悠久之脉。而以壽國者。自壽其身也。朕則我公之
壽。豈有艾哉。將來惕夢卜之知。登論思之堂。必且爲

聖天子終始惠顧東南根本重地而吳民之沾被福澤更未有窮也。請率我諸紳士爲公進爵無算而因以介壽者佐驪歌焉。

祝壽民佟公祖五袞榮誕序

壽翁佟公之膺

簡命而來我吳也。始于

今上龍飛之二載。癸卯孟夏。迄今歲在己酉。以絳縣老人法推之。凡三十有七甲子矣。易曰。久道化成。于公益驗。請得而申言之。國家財賦。強半輸自東南。而三吳尤甲天下。殷富之名。所由來著也。自罹兵燹。後瘡痍乍起。元氣未充。小民終歲勤動。應縣官之追呼。而胥徒五伯。更牟蠹其間。且俗喜夸飾。鮮園桃蟋蟀之

風。譬。則。統。袴。子。弟。內。耽。曲。蘖。靡。曼。外。驚。跼。踖。博。塞。日。
股。月。削。貌。雖。腴。而。神。實。瘠。所。不。立。槁。者。則。賴。有。國。醫。
在。劑。參。苓。以。進。之。爲。之。補。其。虛。耗。駐。顏。猶。壯。盛。也。若。
佟。公。真。我。吳。國。醫。哉。曩。初。下。車。卽。廉。飭。郡。國。屬。吏。與。
爲。更。始。大。法。小。廉。務。以。身。先。之。出。納。之。間。清。風。滿。座。
舉。纖。悉。耗。羨。革。除。殆。盡。于。是。有。司。徵。收。亦。罔。敢。處。膏。
自。潤。民。困。賴。以。頓。蘇。此。源。清。流。潔。休。養。民。生。滋。培。國。
脉。之。第。一。大。補。劑。也。吳。澤。國。時。苦。淫。潦。海。門。虞。山。婁。
東。練。川。等。濱。海。之。區。歲。常。告。祲。公。每。捐。俸。入。設。法。賑。

貸不啻倚公爲歲客。秋淮揚大水。室廬漂蕩。民盡爲魚。啼饑號寒。傷心慘目。公偕撫公韓心翁。乘一葉小艇。衝寒冒雪。出沒驚濤駭浪中。巡行勞來。本折兼輸。計口給食。所全活無算。勿令民窮走險。貽

朝廷南顧憂。其功爲何如哉。江省往多逋賦。催科之吏。中考成者。項背相望。公嘔心調劑。民不擾而征輸應。自是積逋一清。歲每登額。昔時所未有也。公問民疾苦之餘。輒留心學校。觀郡邑學。傾圯慨狀曰。仞墻爲教化攸關。人才所自出。而乃聽其荆榛。吏茲土者。獨

何心乎。遂捐橐鳩工。凡殿廡講舍。櫺星戟門。咸煥朕
鼎新。釋菜鼓篋。各得其所。旣竣事。復博稽先賢之著
于鄉者。爲之整其祠宇。若忠介周公。則特建祠以奉
之。益表揚忠義爲世道人心計。至深遠已。崇聖學明
王道而外。更究心鷺嶺柱下之言。謂三教聖人。其揆
一也。凡寨帷之所及。于梵宇琳宮。率皆捐貲整葺。所
在徒杠輿梁。民無病涉者。郵亭道路。無烟荒蔓梗者。
兼施仁不報之地。如掩骼埋胔等類。未易更僕數。又
嘗鏤訂感應篇。廣爲流布。使斯人皆悚朕遷善遠罪。

以佐

聖天子明刑弼教之治。所謂中心安仁爲善。如不及無所爲而爲之者。殆于公見之。凡若此者。皆我國醫之潔已養民以壽其民。殫精裕國以壽其國。而因以民生之。又安國脉之強固者。自壽其身也。其壽寧有量哉。今歲乾月旣望。屆公五袞大慶。庚星炳曜。奕奕薇垣。余不以三錫方來。九如游至者。祝公之天賜純嘏。而直以公之蒞任至今。仁心仁政爲余所親炙。猷聞者。祝公之自求多福。皆質言非諛言也。請以是介千

秋觴而進。

祝介存趙公七袞壽序

康熙五年歲次丙午嘉平二十有七日爲介存趙公
七袞攬揆之辰。吾郡邑之縉紳戚友。徵余言爲壽。余
雖年益邁。筆益枯。其何能以不文辭也。憶歲在順治
十四年丙申。公方登六袞。時余待罪綸扉。公次君元
康。亦相與珥筆共事。弗獲馳歸。捧觴屬余一言。驛詞
祝余。猶記詞無誇誕。不過紀公之事。親居官立身
行已。生平梗概。有如松栢之飽雪霜。謝華郁根莖枝
葉。皆含苦味。植本貞固。應享大年。云爾。迄今荏苒十

年矣。余蒙恩

予
息丘園。適與公比屋而居。又值公七袞大慶。余
對流光之如駛。而竊喜公之纓鑠倍常。余亦差
強。似乎我兩人者。皆勝十年前也。能不奮然執
事。勿誇誕其詞。而以質言祝乎。公自絕意仕進。以
來。不事家人生產。不作兒孫馬牛。旗鼓詩壇。主盟奕
社。無遠里。時時往來。託興其間。詩效淵明。有和陶
以。集謂其喜貧相似。喜酒相似。嘯傲東軒。聊得
此。牛。似公之真率。高邁性情。與諸非若世人之傲。

陶集陶僅僅于聲口。追琢間比擬肖似而已也。至于花晨月夕。無不與余連袂銜杯。問水尋山。無不與余扶筇縱履。余謂老友中之至今少。而韻者莫過于公。公亦謂老友中之不服老。而差強人意者。亦莫過于余。終日徜徉以逍遙。共遊羲皇之世。宜乎公之愈少。而余亦未老也。雖然。公尤有不可及者。蕭然一室中。不啻吸露餐霜。而養高彌甘。礪守彌貞。余十年前所稱根莖枝葉皆含苦味。故植根堅固。應享大年者。依然猶昨也。公之爲壽。更復可量哉。而况子若孫之繩

文通公集

卷之五

介有趙公
七襄壽序

三

繩振振。蓋未有艾。將來之躋華廡而奮扶搖。所以發
榮松栢之勁幹者。正如日方升。又何必別綴繁詞。拾
華封餘唾。以介景福于千秋也。請公快讀余言。而進
爵無算。

壽李母宋太夫人七有八序

今上五年戊子秋七月七日

司馬五絃李公母夫

人七。褰有八。懸睨之辰。公以中樞鞅掌。未獲戲絲北堂。先期引言。徵詞介壽。其言曰。我母宋氏。本名族。年十六。于歸。會我大父之病劇也。朝夕付湯藥。衣不褫帶者百餘日。大父于彌留之際。嘖有孝婦之稱。繼而及我。先君子委衣哀毀逾節。自茲長齋志戚。又一年來如一日。生平無疾言色。接宗親如獲。

一本以寬和仁恕余以其言起而嘆曰太夫人之克
嫺而前孝行著稱于閭內有如此乎太夫人之克
敦而後慈懿範洽聞于宗黨内外有如此乎是

卽魯

之詩所頌令妻壽母矣公之言足以爲

太夫人

同侯余言哉雖然此太夫人之自爲壽

也而

外知之所以壽太夫人者乎公起家吳興

司

世未嘗察察闕闕以市名譽公守介而

性

民之不能衣且食葬且婚者悉有以

濟

尤多平反所全活者不可數計迄今

吳興士民。猶有望峴山而絢然而思者。不減昔年羊公之仁之見思于襄陽也。此公之以陰德壽其太夫人者。余固聞且見之于其爲司李時也。而公累官至今。其所行陰德。尤有出于余見聞所不及者。不知其幾也。然則太夫人固自有以爲壽。而又有公之所以壽太夫人者。其算寧有艾哉。公又何必以萊衣千里。未能縮地。捧觴爲快快也哉。公旣以仁存心。則第仰泰岱而祝岡陵。顧東海而賀添籌可矣。甚矣惟仁者爲能壽其親也。余于公爲部氓。又前後同官也。知公

頗深。故知公太夫人之壽無疆。謹拜手執爵爲之序。而因以告天下之欲壽其親者。

與胡夫人壽有同異皆屬有道質言可史可傳

陳

百史先生評

祝李母戴太夫人八袞序

歲戊子長至日。太史李辰玉過予而請曰。吾大母戴氏春秋八十。嘉平月之念有四日。爲設悅之辰。不肖叨列史館。未獲偕吾父及昆弟。稱觴堂下。願得先生一言。郵致之爲壽。余辭曰。余素不善誦。且崇岡茂陵。日升川至之語。溢于大夫庶士之口者。子足以壽大母矣。何取余言。太史君曰。不肖之有請于先生者。毋以謾言祝願。以質言祝也。余曰。若是則余何敢辭哉。昔史遷嘗自稱云。子于某善。故得聞云云。子于某之

子某之孫善。又予嘗過某處。見長老某某云云。大約言必據實。則其人其事可傳。而其言亦因之以傳也。余請以質言爲太夫人酌而祝焉可乎。太夫人出吳江望族。余吳江人也。耳熟家世。余兒世濂又與太史君有同譜。誼得朝夕過從。甚友善。又金陵士大夫之在朝者。艷稱里中門第。必以李氏閨懿爲法。如出一口。余是以知太夫人者頗悉。而所以爲太夫人壽者。不敢以諛而以質也。太夫人于歸思雲公。其善相夫子克事舅姑。柔儀令則。無間于妯娌戚黨者。不具論。

憶思雲公捐館幾二十載太夫人秉家督內外肅然
有丈夫子二蜚聲庠序俱以博學篤行稱長卽太史
君封翁皆太夫人之教也孫男子五悉有能文名
太史君力學好古傑然負他日讀書宰相之望又
皆太夫人之教其子以及其孫也余因是而羨太夫
人之善自爲壽也夫令母之壽孰有大于訓子課孫
世爲文學顯人又有登石渠金馬之堂而梯榮膺于
未艾流令名于無窮使天下之人咸推其所自以歸
美于母德乎余因是而又羨太史君之善壽其大母

也有封翁修甫公率其子若姪戲絲堦前稱千秋觴而太史君服官在

朝于珥筆承明之暇。驛詞致祝。悅封翁之心。以轉悅太夫人之心。則凡爲孫之壽其大母者。孰有過于太史君乎。且時方欣遇。配位覃恩。太史君請

制詞壽其父若母。以轉爲太夫人壽。其光寵何如。又奚借親知誦言爲哉。余顧不敢繪西池之圖。述南山之頌。誇東海之咏。侈北斗之杓。以諛言祝。而以太夫人之能教其子若孫。以有成之實言祝也。言雖不文。亦

庶幾史遷氏之據實云

教子若孫一案衍成機法前後援引序次皆本分
所應有無近時掇拾之病此等文塋而知爲吾友
豈凡先生矣

陳百史先生評

壽胡母張太夫人六寮序

從來婦德之堪稱者。勤儉溫柔。孝敬慈仁。有其一焉。皆足以著則閭內。發祥後裔。而德之最大。爲學士大夫之所不可及。以艱貞之苦。基錫福之隆者。則莫如節。云。攷之詩人所載。于婦人女子之事。自芣蘋湘藻。求桑采蘋。抱衾宜雁。雜佩蓄旨。無不采而錄之。獨春秋所書終始全節。不失婦道者。惟紀伯姬一人。何詩人采風如此。其寬而春秋立法。不輕許爲婦者。以節若斯其謹嚴歟。豈事在閭井民庶之間。蔑從赴告。故

不得書而諸侯公卿夫人素範于禮而習于訓宜于節鮮有弗全者亦竟寥寥無足紀歟抑節之難全也自古爲然歟求之今日則惟胡母張太君有焉太君爲予袞胡太史大母戊子嘉平月念日太君開六袞適予袞自楚典試歸予袞尊人機石公又晉秩京朝官太君子若孫懽聚一堂舞斑上壽真一時盛事也同朝諸縉紳謀所以酌而祝之而謬屬不文之余余于予袞有一日之長頗悉太君生平竊津津樂道其事其何能以不文辭哉夫人爭羨太君有子仕于外

爲廉吏而以最聞內擢此爲母者所不能必得之于子也有孫男子三人皆顯名文學而長卽太史君行且彙征多士對揚

休命佇膺進賢上賞此又爲大母者所不能必得之于孫也天下之爲母者孰有快于太君乎天下之爲大母者亦孰有快于太君乎可以酌而祝矣金子曰未也夫人亦知太君自有子以暨有孫得致有今日者孤幃隻影茹幾辛酸風雨雞鳴歷幾寒暑益非一晨一夕于斯迄今殆四十二年所耶太君系出名族

夙嫺禮義。年十八。于歸奇峰公。甫浹歲。遽稱未亾人。
時僅有遺腹六月。懷刃衣帶。矢死靡他。倘遺腹之男。
女未卜。則太君之自處。尚未料也。幸而舉機石公。太
君始堅意保孤。冀延胡祀。會家計窘甚。零仳不支。太
君日事紡績。爲教育資。卒使六月遺腹。卓然成立。而
且蜚聲仕路。顯榮未艾。太君之得有子。若此者。難乎
否也。機石公連舉丈夫子三大君。又以訓子之餘課
孫。至脫簪珥。求師友。督之益力。予袞弱冠。卽成進士。
讀中秘書。餘亦聯翩奮起。太君之得有孫。若此者。難

乎。否也。若乃太君之勤儉溫柔。孝敬慈仁。爲內外屬
之所艷稱。而無間于婦人女子。爲懿德于太君直細
行耳。然則學士大夫之所不可及。而以艱貞之苦基
錫福之隆者。節如太君之謂也。詩人不勝采。春秋法
得書。請以是酌而祝焉。太君回思懷。亦矢志之日。其
必怡怡陶陶。爲之舉觴無算乎。諸縉紳曰。善。遂書此
以爲壽。

由今追昔。讀者於稱觴事。見感慨卽此。知文生於
情也。若近日浮采僞譽。不足當揮毫一笑矣。陳百

史先生評

大
方
小
方

壽張母馮太夫人七袞有七序

順治八年辛卯夏五二十有九日。爲侍御趨正張公太夫人七十齡設悅之辰。時公方新膺

簡命。按視畿南北。是爲京差。例得出入

殿陛。使省慈幃。公同母弟次君。亦以舉業高等。承

恩詔來貢于廷。一時昆仲懽聚。率其孫男女環繞膝前。

稱太夫人觴。朝列榮之。而徵言于余。非以余之椎魯爲能文也。以公昔年曾與余共事樞曹。昨歲按吳。又以余隸公部下。習公爲最深。而竊聞太夫人之淑德。

懿行著賢母稱克享遐齡于未艾者爲最悉也。請得而申言之。太夫人出晉望族馮氏。無昆弟。以女代子。曲盡孝道。且勸父立嗣。卒賴以延祀保家。消弭族讐。其賢之徵于女德者有如此。及于歸。公考用吾先生。則父移其孝于張氏之門。事孀姑一如其事父母。取與承順。必稱所欲。食糲衣敝。親操井臼。相夫子竭力董幃。以理學聞。尤助成夫子讓產高誼。撫孤姪逾于子。雖晨昏不繼。無忤容。無怨言。用吾先生以五經教授來學。常萃及門至數百人。一一爲供饔。內有貧無

力者更周恤有加。所成就弟子多取科名。太夫人之功半也。其賢之徵于婦道者有如此。長君趨正公成進士。太夫人初無德色。常訓之曰。做官須爲清白吏。我終其身糲食垢衣。有所不辭。公恪遵母訓。務爲廉吏。初任中牟。再調元氏。所至有聲。所去見思。以最奏轉樞曹。尋改御史直冠栢臺。歲庚寅奉

命巡按蘇松。甫下車。釐奸剔蠹。攬轡澄清。雖未及兩月。適下議撤之令。而小民之蒙其休澤。汚吏之惕其霜威者。不啻巡行一週。伊誰之教也。其賢之徵于母儀。

者有如此。是以天眷懿德。厚其報施。宜爾貴。宜爾壽。
宜爾康寧。宜爾子孫繩繩。振振今日。同朝諸大夫。可
以爲太夫人酌而祝矣。雖然。我儕之執爵而祝。何如
中牟元氏歌咏甘棠之民。祝之至今不衰乎。又何如
近日吳民之爲公畫像立祠。因祝公所自出而願爲
太夫人添籌益算者。卽億萬戶不止乎。今公又以

聖政清明。特簡按畿輔。將來首善之交。口尸祝不更有
進于中牟元氏及三吳之民者乎。然則公之所以祝
太夫人者。至矣。茂以加矣。非我儕三多九如之諛詞。

所能誦揚萬一也。凡爲人子而欲壽其親者，一視公之所以爲祝可也。

述夫人賢用三如此文氣畧一小結後用推衍法文有法所以有情更不須艱深文淺易也。

陳百史

先生評

金文通公集卷之五終